

«Igl ei in' experientscha per la veta»

Igl ei stau siu mistregn da siemi gia en scola primara. Questa stad ha Massimo Bundi da Mutschnengia entschiet il tierz onn d'emprendissadi sco florist en ina fatschenta a Cuera. Sco sulet en quei mistregn representa il giuven da 18 onns il Grischun al campiunadi svizzer dallas professiuns.

AUGUSTIN BEELI/FMR

«Jeu sun buca specialmein nervus. Igl ei semplamein ina buna experientscha ch'jeu astgel far», di il giuven da 18 onns. Oz mesemna par-ta Massimo Bundi el decuors dil di dalla Val Medel viers la capitala svizra. Quest'jamna ha el vacanzas, e quels dis sededichescha el al project «Swiss Skills 2022» – il campiunadi svizzer dils mistregns a Berna. En tut separticipeschan varga 1000 giuvenils all'occurrentza ellas hallas d'exposiziun sper il stadion dil Wankdorf. Naven dil bustab A sco automaticher tochen V sco vinolog e Z sco construidra da fifas da zinn dat Swiss Skills 2022 ina envesta ella varietad enorma da 150 professiuns.

Talent creativ

Da mesjamna tochen dumengia spetgan ils organisateurs 120 000 visitaders a quell'occurrentza gronda. El stadion da Wankdorf ei sonda il final dil campiunadi culla cerimonia dils 85 megliers en lur professiun. Gl'emprendist da Mutschnengia representa la branscha dils florists. Secapescha ch'el detti tut, il pli impurtont seigi ch'el hagi insumma retschiet la schanza

da separticipar, manegia el. Dapi in decenni ei la clamada da florist buca pli ina tipica da giuvnas. Ch'el sco giuven fetschi gl'emprendissadi en quella seigi negin tema, manegia Massimo Bundi. Apparentamein dat ei oz era picturas, miraduras e lennarias, l'emanzipaziun pertucca omisduas schlattinas.

«Jeu hai adina zambergiau bugen e fatg decoraziuns», rauenta il giuven fegl da purs. Gia ella tschunavla classa hagi el scuviert la floristica sco siu mistregn da siemi. Far tschupials per las vacas che scargavan dall'Alp Pazzola era ina da sias lavurs digl atun. Flurs, caglias, dascha e ruba dalla natira dat massa spazi al talent crea-

«Jeu hai adina zambergiau bugen e fatg decoraziuns.»

Massimo Bundi

tiv. El scalem superiur ha Massimo astgau fuffergnar a Mustér tier Primus Solèr, «lu eis ei stau clar definitivamein tgei mistregn employer», di el. Demai che la piazza era gia occupada leu, ha el encuret ed anflau a Cuera ina pussev-ladad d'emprerder «siu» mistregn. Tiel hortulan Urech fa el actualmein il tierz onn d'emprendissadi. Sia passiu e siu entusiassem per la floristica ha la finala intima el da s'annunziar pil campiunadi svizzers dallas professiuns.

Quater pensums da concurrenza

Gia il fevrer havessi el giu gust da s'annunziar, hagi denton buca propi ughegiau e la finala

emblidau. «Gl'uost vargau han mias collegas da lavur la finala insistiu ch'jeu dueigi tutina inoltrar il dossier.» El ha retschiet glich verda da Berna ensem culs pensums dalla concurrenza. «En tut essan nus treis gruppas da floristas e florists. Mintgamai tschun ein en concurrenza e battan pigl'emprems plaz», explichescha il Medelin. Ils emprems van vinavon el miezfinal, lu vegn battiu pils plazs el final. Massimo Bundi ei ambizius, el di denton, «igl ei in' experientscha per la veta. Jeu tuornel en scadin cass cuntents e satisfats.»

Il sulet florist grischun al Swiss Skills 2022 sto mussar sias habilitads en quater spartas. Sco en in examen professional ha el d'ademplier quater pensums: In'ura ha el peda per crear in matg fluras tier la tematica «Helvetia». Ina secunda ura ha el peda da far ina decoraziun per ina spusa cul tema «Woaw». La creaziun individuala duei svegliar l'attenziun. Sco tierz pensum da concurrenza sto el emplenir ina vasa ni in plumatsch da fluras cun enza-tgei innovativ. «Quei pensum sto esser finius en 90 minutas», declara Massimo. Cul quart e davos pensum vul la giuria examinar gl'inschign e la diligenza da candidatas e can-

didats. «Speed Competition» ei in pensum da sorpresa ch'els ston ademplier en 20 minutas. Il material da basa, pia fluras, caglias, verdem e material da ligiar ch'els drovan ei semtgau ella halla da concurrenza ed a disposiziun. «Jeu stoi mo prender cun mei gl'etui culs uaf-fens», di gl'emprendist. Quel cuntegnorsch e cunti special dils florists, laorsch per tagliar fildiroms e zaungas per ligiar.

Dapli informaziuns tier l'occurrentza gronda a Berna mira: www.swiss-skills.ch.

Cuort e bien

Data da naschienscha:

22 d'avrel 2004

Segn dil zodiac:

Taur

Liug da domicil:

Mutschnengia, Val Medel

Flura preferida:

Protea reala («Königsprotea», las grondas fluras semeglian quellas dall'artischoca e creschan ell'Africa dil sid)

Hobi preferiu:

Spassegiar ella natira

Liug da spassegiar preferiu:

Stagias ed Academia Vivian